



Ineqarnermut akiliutit qaffakkiartuinnartut, kiisalu boligsikring tapiissutit qaffanneqarnissaat, aammalu kiassarnermut akiliutit qaffasippallaarnerat pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen, Partii Naleraq)

Ilumoorpoq pisortat inissiaataanni attartornermut akiliut akissarsiat qaffaataannit annerusumik qaffannikummat ukiut qulit kingulliit ingerlaneranni. Tamatumunngali atatillugu pingaaruteqarpoq eqqaamassallugu, ukiorpassuarni annikippallaamik attartornermut akiliuteqartoqartarnikummat aningaasartuutaasarsimasunut naleqqiullugu.

Attartornermut akiliutip appasippallaarnera pissutaalluni aserfallattaaliinerit iluarsaassinerillu avaqqunneqarsinnaangitsut akissaqartinneqartarsimangillat, tamatumalu kinguneraa pisortat inissiaataasa aserfallalluinnarnerat aamma iluarsarsinissat kinguaattoorfiupput annertuumik.

Demokraatini tamanna tungavigalugu paasisinnaavaarput attartornermut akiliut akissarsiat qaffaataaniit annerusumik qaffassimammata tamatumunngalu atatillugu oqaatigissavarput, akissarsiakinnerit inaanni akitsoriaatit annikillisinneqarnikummata boligsikringimut tapiissutit pillugit malittarisassat pissutaallutik.

Kiassarnermulli akit eqqarsaatigalugit Demokraatit sinnerlugit Inatsisartunut ilaasortap Michael Rosing matumani ataatsimiinnermi oqallisigineqartussamik siunnersuuteqarnikuvoq kiassarnermut uuttuutiniq ininut ataasiakkaanut ivertissuinissaq pillugu. Misilittakkat takutippaat suliniut pissutaalluni 40 procentit angullugit kiassarneq appartinneqarsinnaasoq. Ininut ataasiakkaanut kiassarnermut uuttuutiniq ivertissuineq taamaasilluni attartortunut sipaallaqqissunut iluaqusiisussaavoq aamma tamatta kiassarnermik atuinitsinnut nukimmillu.

Demokraatini immikkoortumi maannakkut suliniutigineqartut iluarisimaarpagut taamaattumik pissutissaqanngilagut Inatsisartut oqaaseqaateqarnissaannut siunnersuut tapersissallugu.